

ADMINISTRACIÓN LOCAL

MUNICIPAL

POIO

Outros documentos, notificacións e informacións públicas

BASES REGULADORAS PARA A SOLICITUDE DE GRUPOS ACOLLIDOS AO PLAN MÚSICO CULTURAL 2022

Bases reguladoras para a solicitude de grupos ACOLLIDOS ao Plan Músico-Cultural PARA O ANO 2022

1. Obxecto

Nunha realidade social, económica e cultural claramente condicionada pola crise socio-sanitaria actual, a Concellería de Cultura ten un especial interese en seguir promovendo e mantendo a actividade musical, reforzando a programación dos diferentes eventos realizados no noso municipio con grupos de música local, para evitar a súa desaparición e seguir cooperando con este sector duramente afectado pola crise da COVID-19.

Así, o Concello de Poio, a través do Servizo de Cultura, no seu afán de impulsar e fomentar a cultura galega mediante a promoción do folclore e a música tradicional e popular galega, pon en funcionamento o Plan Músico-Cultural 2022 para a participación dos grupos locais de música acollidos a este programa nas festas patronais e naquelas outras que teñan un raizame importante no termo municipal de Poio, contribuíndo desta maneira á dinamización cultural e musical no noso municipio.

Tamén poderá retribuírse a participación destes grupos de música naquelas actividades de carácter cultural realizadas no término municipal de Poio relacionadas co patrimonio, a historia, a arte, a literatura, actividades cinematográficas, exposicións de artes plásticas ou temas similares que fomenten a educación cultural da poboación, e que serán obxecto de valoración por parte do Servizo de Cultura.

O Plan está deseñado para promover a consecución dos seguintes obxectivos segundo os parámetros da Axenda 2030:

- Modernizar a inscrición dos grupos locais de música a través dun catálogo virtual, que se configura como un instrumento vivo que permita dar visibilidade aos diferentes grupos de música existentes no noso municipio, o cal será actualizado de maneira constante durante a vixencia do programa.
- Incentivar a actividade cultural de xeito sostible mediante a promoción de entidades musico-culturais do municipio de Poio, dándolles visibilidade e valorizando o seu labor. Con isto, contribúese ao crecemento económico e sostible deste concello.



Martes, 8 de marzo de 2022

Núm. 46

2. Financiamento

O crédito que se dispón para a concesión das actuacións será de 16.000,00 euros con cargo á partida orzamentaria 334.48901 contemplada no Orzamento Xeral para o ano 2022.

3. Entidades destinatarias

As entidades solicitantes poderán ser as agrupacións e asociacións sen fins de lucro inscritas no Rexistro Municipal de Asociacións, así como as comisións de festas legalmente constituídas que promovan a realización das festas e/ou actividades sinaladas na base primeira.

As entidades interesadas, como organizadoras dos actos, débense poñer en contacto cos grupos inscritos no “Catálogo de grupos do Plan Músico-Cultural do Concello de Poio” para concretar a data da actuación, coñecer as condicións e facilitarlles o concerto.

Os grupos disporán dun escenario ou marco adecuado para que poidan efectuar a súa actuación sen impedimento ningún.

4. Presentación de solicitudes

As solicitudes presentaranse obrigatoriamente por medios electrónicos a través do formulario normalizado dispoñible na Sede electrónica do Concello de Poio (<https://www.concellopoio.gal/index.php/sede-electronica-poio>).

Se algunha das persoas interesadas presenta a súa solicitude de forma presencial, requiriráselle que a emende a través da súa presentación electrónica. Para estes efectos, considerarase como data de presentación da solicitude aquela na que se realice a emenda.

Se a solicitude non reúne os requisitos esixidos nestas bases, requiriráselle á entidade interesada para que emende as deficiencias no prazo de dez días hábiles, con indicación expresa de se non o fixese, teráselle por desistido da na súa petición, de acordo co disposto no artigo 68 da Lei 39/2015, do 1 de outubro, de Procedemento Administrativo Común das Administracións Públicas.

Cada entidade poderá solicitar un máximo de dúas actuacións para cada festa ou evento que organice.

A mera presentación da solicitude suporá que a entidade solicitante coñece e acepta as presentes bases.

5. Documentación

Xunto coa solicitude deberase achegar a seguinte documentación:

- Publicidade en galego do evento na que figure o logo coa colaboración do Concello de Poio, así como tamén, durante o ano 2022 logo conmemorativo do 50 aniversario da declaración de Combarro como Conxunto de interese artístico e pintoresco de carácter



Martes, 8 de marzo de 2022

Núm. 46

nacional. Achegarase cartel en formato PDF, JPG ou PNG e, no seu caso, os enlaces á web e aos perfís de redes sociais nos que se fará constar nas súas entradas aos perfís do Concello de Poio: @concellodepoio

- Certificados de estar ao corrente coas obrigas tributarias coa Axencia Estatal Tributaria, coa Facenda autonómica e coa Seguridade Social.

O Concello de Poio comprobará de oficio a inscrición no Rexistro municipal de Asociacións e a non existencia de débedas coa facenda municipal.

6. Solicitudes excluidas

Quedan expresamente excluídas do Plan Cultural 2022:

- As solicitudes efectuadas por persoas particulares, empresas, comunidades de montes, cofradías de pescadores, centros educativos e ANPAS.
- Aquelas peticións de grupos que superen os límites establecidos na base 10 desta convocatoria.
- Aquelas peticións realizadas por distintas entidades para a mesma festa ou evento.

7. Prazo para a presentación de solicitudes

O prazo de presentación de solicitudes de actuación comezará a partir do día seguinte ao da publicación desta convocatoria no Boletín Oficial da Provincia de Pontevedra (BOPPO).

As solicitudes deberán presentarse cunha antelación mínima de 20 días naturais con respecto á data de realización da actuación.

As solicitudes presentadas con posterioridade ao prazo mínimo de 20 días naturais previsto no punto anterior serán denegadas.

8. Notificacións

As resolucións e actos administrativos practícaranse só por medios electrónicos, nos termos previstos na normativa reguladora do procedemento administrativo común.

As notificacións practícaranse a través da sede electrónica do Concello de Poio. Estas notificacións entenderanse practicadas no momento no que se produza o acceso ao seu contido e entenderanse rexeitadas cando transcorresen 10 días naturais desde a posta a disposición da notificación sen que se acceda ao seu contido.

O sistema remitiralles ás persoas interesadas os avisos da posta á disposición das notificacións á conta de correo electrónico indicada na solicitude. Estes avisos non terán, en ningún caso, efectos de notificación practicada, e a súa falta non impedirá que a notificación sexa considerada plenamente válida.



Martes, 8 de marzo de 2022

Núm. 46

Se o envío da notificación electrónica non fose posible por problemas técnicos, practicarase a notificación polos medios previstos na normativa reguladora do procedemento administrativo común.

9.- Instrución do procedemento

O procedemento de concesión de subvencións tramitarase en réxime de concorrencia non competitiva, por esgotamento do crédito, sen necesidade de prelación das actividades ou eventos entre sí, de conformidade co disposto nos artigos 19.2 e 22 da Lei 9/2007, do 13 de xuño, de subvencións de Galicia.

A instrución do procedemento corresponderalle á concelleira de Cultura, que realizará de oficio cantas actuacións estime necesarias para a determinación, coñecemento e comprobación dos datos achegados polas entidades interesadas.

O servizo de Cultura examinará as solicitudes presentadas e dictará a proposta de resolución. A resolución do procedemento realizarase por Decreto da Alcaldía, e será notificada na forma establecida na base 8.

10. Adxudicación das actuacións

A adxudicación das actuacións apostará pola diversificación das categorías na repartición dos fondos e determinarase aplicando os seguintes criterios:

- Atenderase as solicitudes que realicen as entidades solicitantes ata un máximo de dúas actuacións por festa ou evento.
- Dúas entidades distintas non poderán presentar solicitudes de actuación para a mesma festa ou evento.
- O importe máximo das actuacións autorizadas ás entidades solicitantes para cada festa ou evento será de 480,00 €.
- Para a súa concesión é preciso que acompañen a correspondente difusión publicitaria do evento para o que se solicita a actuación, de acordo co disposto na base 5.
- As solicitudes serán aceptadas, no caso de cumprir todos os requisitos establecidos nas presentes bases, segundo a orde de entrada das mesmas.
- En calquera caso, a concesión das actuacións queda suxeita á dispoñibilidade orzamentaria.

11. Pagamento

O pagamento das actuacións autorizadas con cargo a este programa efectuaráselle directamente ás agrupacións musicais, que deberán emitir a correspondente factura ao Concello de Poio, facendo constar na descrición o nome da festa/actividade e a mención ao Plan Músico-Cultural 2022.



Martes, 8 de marzo de 2022

Núm. 46

Así mesmo xuntarán á factura o certificado acreditativo da realización da actuación, debidamente asinado polo representante da asociación ou comisión de festas a que lle foi concedida a mesma.

O pago realizarase unha vez presentado o certificado acreditativo da actuación e recibida a correspondente factura, que deberá presentarse, no prazo máximo de 30 días naturais contados dende a data da realización da actuación e, en todo caso, antes da finalización do ano en curso.

En consecuencia, o Concello de Poio retribuirá cada actuación autorizada con cargo ao Plan Músico-Cultural cos seguintes importes (IVE engadido), independentemente de que os grupos teñan un caché superior:

- Agrupacións folclóricas: 240,00 € (actuación en procesións, misas e concertos).
- Pandereteiras: 210,00 €
- Corais: 240,00 €
- Música popular instrumental (charangas, batucada, acordeóns, grupos guitarra...): 240,00 €
- Música popular (solistas): 150,00 €.

12. Obrigas das entidades beneficiarias

As entidades interesadas ás que se lles autoricen actuacións, como organizadoras dos actos con cargo ao Plan Cultural, están obrigadas a:

- Poñerse en contacto cos grupos acollidos a este Plan Cultural para concretar a data da actuación, coñecer as condicións e facilitarlles o concerto nun marco adecuado para que poidan efectuar a súa actuación sen impedimento ningún.
- Non se subvencionarán solicitudes que exclúan a lingua galega como lingua de uso vehicular dos soportes divulgativos das actividades (web, redes sociais, cartellaría, folletos e equivalentes). Por tanto, todas as actividades subvencionadas deberán realizarse en lingua galega, sen prexuízo de que tamén poidan incluír outras linguas. Desde o Concello de Poio farase seguimento específico para comprobar o cumprimento desta obriga.
- Informar e publicitar que a actividade está financiada polo Concello de Poio. Deberá figurar a colaboración do Concello de Poio en todos os elementos de difusión relacionados coa actividade subvencionada. Na difusión das actividades subvencionadas en redes sociais, deberán incluír ou etiquetar nas súas entradas aos perfís do Concello de Poio: @concellodepoio
- Utilizar, con carácter xeral, a transversalidade de xénero a través do emprego dunha linguaxe non sexista e inclusiva, elaborar materiais que fomenten a igualdade, tratar as imaxes con valores de igualdade, presenza equilibrada, diversidade, pluralidade de roles e identidades de xénero.
- Obter todas as autorizacións e permisos necesarios para o bo desenvolvemento da actuación.



Martes, 8 de marzo de 2022

Núm. 46

- Aboar as taxas da SGAE, cando corresponda.
- Notificar os cambios que se puidesen producir, e no caso de que a actuación non se levase a cabo tamén poñelo en coñecemento deste Concello.
- Cumprir coa normativa de seguridade e hixiene vixente no momento, así como as recomendacións das autoridades competentes relativas ao COVID-19 no desenvolvemento da actividade.
- Emitir un certificado acreditativo de que o grupo realizou a actuación para poder proceder ao pago da factura correspondente (segundo o modelo dispoñible na sede electrónica do Concello de Poio).

13. Vixencia

As solicitudes de actuacións con cargo a este Plan Cultural terán vixencia durante todo o ano 2022 e estarán condicionadas á existencia de consignación orzamentaria.

14. Órgano de aprobación

O órgano competente para a aprobación destas bases é a Xunta de Goberno Local.

15. Publicidade da convocatoria

Estas bases reguladoras publicaranse no BOPPO e na Sede electrónica do Concello de Poio (<https://www.concellopoio.gal/index.php/sede-electronica-poio>)

16. Tratamento de datos de carácter persoal

En cumprimento co establecido na actual normativa de Protección de Datos de Carácter Persoal, os datos persoais recadados neste procedemento serán tratados na súa condición de responsable polo Concello de Poio, coas finalidades de levar a cabo a tramitación administrativa que se derive da xestión deste procedemento.

As persoas interesadas poderán acceder, rectificar e suprimir os seus datos, así como exercer outros dereitos, tal e como se explica na información adicional sobre Protección de Datos na páxina web do Concello de Poio na seguinte ligazón www.concellopoio.gal/index.php/politica-de-privacidade.

17. Disposición final

O Concello de Poio quedará exento de calquera responsabilidade civil, mercantil, laboral ou calquera outra derivada das actuacións ás que están obrigadas as entidades destinatarias das autorizacións realizadas con cargo a este Plan Cultural.



Martes, 8 de marzo de 2022

Núm. 46

A presentación de solicitudes de actuacións leva implícita a autorización ao Concello de Poio para que publique na súa páxina web e no taboleiro de anuncios da sede electrónica do Concello de Poio a relación de actuacións financiadas con cargo a este Plan Cultural, coas excepcións previstas nas Leis.

Estas Bases entrarán en vigor ao día seguinte da súa publicación íntegra no Boletín Oficial da Provincia.

